




21. maí 2024

Fyrirtæki í pípulögnum þurfa að ráða 360 pípara á næstu fimm árum


Stjórnendur fyrirtækja í pípulögnum innan Félags pípulagningameistara áætla að ráða þurfi 360 pípara á næstu fimm árum. Stjórnendurnir segja að skortur á starfsfólki hafi heft vöxt fyrirtækja í greininni á síðustu árum. Samkvæmt könnun sem Outcome framkvæmdi í apríl til maí fyrir Samtök iðnaðarins segjast 68% stjórnenda fyrirtækja í pípulögnum að erfiðleikar við að finna rétt starfsfólk hafi heft vöxt fyrirtækjanna á síðustu árum. Ekki nema 24% segja að svo hafi ekki verið og 8% segja hvorki né.

Hafa erfiðleikar við að finna rétt starfsfólk heft vöxt fyrirtækisins á síðustu árum?



■ Já ■ Hvorki né ■ Nei

Telur þú að innlent menntakerfi muni mæta færniþörf fyrirtækisins litið til næstu fimm ára?




■ Já ■ Nei ■ Veit ekki / vil ekki svara

Samtök iðnaðarins telja að litið til næstu ára sé ljóst að vandræði blasa við varðandi misræmi milli færniþarfar fyrirtækja og þess hvað innlent menntakerfi nær að anna. Samkvæmt könnuninni segja 28% stjórnenda fyrirtækja í pípulögnum að innlent menntakerfi muni ekki mæta færniþörf þeirra fyrirtækis litið til næstu fimm ára. 40% segja hins vegar að innlent menntakerfi muni mæta þessari færniþörf og 32% segjast ekki vita það eða vilja ekki svara.

Samkvæmt niðurstöðum könnunar Outcome þurfa fyrirtæki í pípulögnum að ráða 475 manns á næstu fimm árum. Af þeim þarf greinin 360 pípulagningarmenn eða um 72 á ári. Þetta er nokkuð meira en sá fjöldi pípara sem hefur á síðustu árum lokið sveinsprófi en að jafnaði hafa 35 lokið slíku prófi á ári síðustu fimm árin. Ljóst er að fjölga þarf menntuðum í pípulögnum sem ljúka sveinsprófi á næstu árum ef mæta á færniþörf greinarinnar. Að öðrum kosti er viðbúið að skortur á starfsfólki muni áfram hefta vöxt í greininni.


Áætluð árleg þörf fyrir pípulagningarmenn og fjöldi útskrifaðra með sveinspróf á ári



Heildarfjöldi starfandi í pípulögnum var tæplega 1.400 í upphafi þessa árs samkvæmt gögnum Hagstofu Íslands og hefur þeim fjölgað um ríflega 700 yfir síðustu tíu ár sem er rífleg tvöföldun. Greinin er afar mikilvægur hluti byggingariðnaðar hér á landi og byggist starfsemi hennar fyrst og fremst á menntuðu starfsfólki í pípulögnum. Fjöldi starfandi í pípulögnum var rétt um 8% af heildarfjölda starfandi í byggingariðnaði í upphafi þessa árs. Gangi áætlanir stjórnenda eftir verður heildarfjöldi starfandi í greininni orðin ríflega 1.850 árið 2028.

Fjöldi starfandi

ÍSAT 43.22 Pípulagnir, uppsetning hitunar- og loftræstikerfa



Aðspurðir um hvaða sérfræðipækkingu fyrirtækinu vanti á næstu fimm árum segja stjórnendur fyrirtækjanna að fyrst og fremst sé þörf á hæfum og reynslumiklum pípurum. Þurfa þessir aðilar að geta sinnt ýmsum ólíkum störfum innan greinarinnar í pípulögnum og viðhaldi. Áhersla er á aðila með fagmenntun og reynslu. Þá vantar einnig verkfræðinga og fólk með aðra sérþekkingu.


Mikil þörf er á innviða- og íbúðauppbyggingu hér á landi litið til næstu ára. Samtök iðnaðarins telja líklegt að þörfin fyrir pípura verði meiri en niðurstöður könnunarinnar sýna ef farið verður í það af fullum þunga að mæta uppsafnaðri viðhalds- og nýfjárfestingaþörf í innviðum hagkerfisins.

Heildarfjöldi starfsfólks þeirra fyrirtækja sem tóku þátt í könnuninni er 257. Af þeim eru 133 eða 52% fullmenntaðir pípurar og eru erlendir pípurar 67 eða 26% af heildinni. Nemar sem starfa hjá fyrirtækjunum eru 62 eða nær 24%.

Könnunin var unnin af Outcome fyrir Samtök iðnaðarins í apríl til maí 2024. Innan fyrirtækjanna sem þátt tóku í könnuninni starfa um 19% af heildarfjölda starfandi í greininni og náði könnunin til fyrirtækja innan Félags pípulagningameistara sem skilgreind eru sem fyrirtæki í pípulögnum samkvæmt ISAT staðli Hagstofu Íslands.

Starfsfólk í pípulögnum

Niðurstöður spurningakönnunar



■ Íslenskir pípurar ■ Erlendir pípurar ■ Nemar ■ Aðrir